



Buc ina gronda, denton ina biala parada. La cumpignia da mats ellas uniformas cotschnas e blauas.

FOTOS P. ALIG

Dumengia dil Scapulier a Vrin

Perdanonza solemna a Vrin

DAD AUGUSTIN BEELI / ANR

■ En diversas pleivs dalla Surselva fan ins perdanonza da mesa stad, aschia a Dardin, Ladir, Camuns e Vrin. Entadem la Lumnezia ei la populaziun separticipada alla fiasta ecclesiastica, dedicata al s. Scapulier ni cuolm Carmel. Dapi cu ins fa a Vrin perdanonza entuorn ils 16 da fenadur ei buc enconuscent. La baselgia parochiala ei dedicata alla Naschientscha da Maria (8 da settember) ed a sogn Gion Battesta (24 da zercladur). Forsa ei la perdanonza dil fenadur cumbinada cullas lavurs stagionalas dil puresser. Ei savess esser ch'ins ha fixau ella – per motivs pratics – sil temps ch'ins haveva finiu da far fein el vitg e sendeva sils mises. La fiasta da Nossadunna dil s. Scapulier ni dil cuolm Carmel ei cumbinada culla veneraziun da Nossadunna e culla confraternitad dil Carmelitans, in uorden ch'ei staus fetg populars ell'Europa. In scapulier ei in toc teila, in segn sacramental ch'ins purtava sut il vestgiu. En biaras pleivs catolicas fuvan confraternitads dil s. Scapulier seformadas. Quellas uniuns religiusas recevevan commembers, sco segn dil commembardi survegnev'ins in scapulier. Quei «talisman» purtavan ins sil pèz, el valeva sco aua benedida ed agid divin, el schurmegejava dil schlier e dueva dar curascha per dumignar il mintgagi.

Il motiv ch'ins numna la dumengia dil Scapulier era quella dil cuolm Carmel ha connex culla visiu dil profet Elia el Veder Testament. Quel haveva viu sil cuolm Carmel ina nebla a sesalzar che figurava



La processiu duront il retuorn en baselgia.

marvigliusamein Maria, la mumma da Diu. Probabel han ins introduciu a Vrin la fiasta dil s. Scapulier e dil cuolm Carmel culla consecraziun dalla baselgia renovada. Quei ei schabegiau igl onn 1694. La dumengia dil s. Scapulier ha la populaziun da Vrin festivau solemnamein perdanonza. Sur *Dirk Jasinski* ha celebrau il survetsch divin. En siu priedi ha el ha puntuau la mudestad da Maria, Nossadunna seigi in exempel per la veta moderna. Il Chor mischedau Vrin/Surin ha cantau parts ord la messa da *Marcel Solèr*, il cumponist sez ha accumpignau il chor all'orgla. Sco mintg'onn haveva la giuventetgna fatg tschupials per la statua da Nossadunna e per la porta-baselgia. La processiu ha menau dil vitg si encun-

ter Crusch. Al spartavias encunter Vrin Dado ha sur Dirk fatg ina cuorta devoziun e dau la benedicziun. La cumpignia da mats ha fatg parada e las giuvnas els costumes tradiziunals dalla confraternitad han purtau Nossadunna.

Entochen ussa fuva la devoziun da perdanonza mintgamai il suentermiezi, ella fineva cun in concert dalla Societad da musica Greina Vrin. Uonn ha la musica delectau sil plaz per l'emprema gada directamein suenter las funcziuns ecclesiasticas. Leu ha la cumpignia da mats era dau las salvias pigl augsegner e per auters dignitaris ch'ei stai presents alla perdanonza. Per LQ ha *Pieder Alig* documentau la festivatad entadem la Lumnezia.



Il reliquiaris han ins medemamein purtau ord baselgia en processiu.



Il capitani da mats ha purschiu salid agl augsegner ed ad ulteriurs dignitaris.



Il tschupi per Nossadunna: Sin bratsch porta ella igl affon, en in maun dus scapuliers.



La parada dalla cumpignia da mats cullas bandieras sgulatschontas.



Suenter la cumpignia da mats suonda il chor mischedau.



Sur Dirk Jasinski culla monstranza sut il baldachin.